



Sud Bosne i Hercegovine
Суд Босне и Херцеговине

Broj: SI 3 Iž 030868 18 Iž
Sarajevo, 30.10.2018. godine

Sud Bosne i Hercegovine u Sarajevu, u apelacionom upravnom vijeću sastavljenom od sudija, Srete Crnjak, predsjednika vijeća, Dinke Bešlagić-Čovrk i Vesne Trifunović, članova vijeća, odlučujući o žalbi političkog subjekta Demokratska fronta-Građanski savez, Željko Komšić:BIH POBJEĐUJE, izjavljenoj protiv odluke Centralne izborne komisije Bosne i Hercegovine, broj: 05-1-07-5-433/18 od 22.10.2018. godine, u pravnoj stvari novčane kazne, u nejavnoj sjednici održanoj dana 30.10.2018. godine, donio je

R J E Š E N J E

Žalba se djelimično uvažava, Odluka Centralne izborne komisije Bosne i Hercegovine broj 05-1-07-5-433/18 od 11.10.2018. godine preinačava u pogledu visine novčane kazne na način da se političkom subjektu Demokratska fronta-Građanski savez, Željko Komšić:BIH POBJEĐUJE, umjesto iznosa od 7.000,00 KM izriče novčana kazna u iznosu od 5.000,00 KM (pet hiljade konvertibilnih maraka) koju će snositi solidarno članice ove koalicije Demokratska fronta i Građanski savez.

U preostalom dijelu u kojem je utvrđena odgovornost političkog subjekta Demokratska fronta-Građanski savez, Željko Komšić:BIH POBJEĐUJE, ožalbena odluka ostaje neizmjenjena.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, utvrđena je odgovornost političkog subjekta Demokratska fronta-Građanski savez, Željko Komšić:BIH POBJEĐUJE iz razloga što je dana 04.10.2018. godinena predizbornom skupu održanom na Sonom trgu u Tuzli dozvolio isticanje plakata sa sadržajem koji bi nekoga mogao navesti na ili podstaći na nasilje i širenje mržnje, čime su prekršena pravila ponašanja uizornoj kampanjiiz člana 7.3 stav (1) tačka 7) Izbornog zakona BiH, pa je za tu povredu novčana kazna izrečena navedenom

političkom subjektu u iznosu od 7.000,00 KM, koju će snositi solidarno članice navedene koalicije Demokratska fronta i Građanski savez.

Politički subjekt Demokratska fronta-Građanski savez, Željko Komšić:BIH POBJEĐUJE je blagovremeno uložio žalbu na navedenu odluku.

U žalbi, navodi da nije moguće utvrditi autentičnost fotografije iako je preuzeta sa dva internet portala, jer se sa sigurnošću ne može utvrditi da je u pitanju predizborni skup Demokratske fronte, zbog čega izražavaju sumnju u autentičnost istih. Osim toga, rukovodstvo Demokratske fronte, organizator skupa, kao i pojedini članovi i gosti koji su prisustvovali predizbornom skupu u Tuzli, nisu uočili da su se na istom isticali plakati sa navedenim sadržajem.

Centralna izborna komisija BiH je u odgovoru na žalbu predložila da se žalba odbije kao neosnovana.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da je žalba djelimično osnovana.

Kako proizilazi iz stanja u spisu, Centralna izborna komisija BiH je na pravilan i zakonit način utvrdila odlučne činjenice koje opravdavaju u predmetnom slučaju primjenu odredbe člana 7.3 stav 1. tačka 7. Izbornog zakona. Naime, CIK BiH je uvidom kompletan predmet potpuno i pravilno utvrdila odgovornost žalitelja za povredu citirane zakonske odredbe zasnivajući je na činjenici da kao organizator predizbornog skupa održanog 4.10.2018.godine nije smjela dozvoliti prisutni na skupu kao i njihove pristalice ističu plakat sa sadržajem: „Glasom koji za Komšića damo, glogov kolac Čoviću zabijamo. I zato ga ko bosanska raja i Kolindi zabijamo do jaja“.

Sasvim je jasno da je poruka upućena Dragani Čoviću kao jednom od kandidata za hrvatskog člana Predsjedništva i to u negativnom kontekstu. Osim toga, drugi dio poruke se odnosi na aktuelnu predsjednicu Republike Hrvatske, Kolindu Grabar-Kitarović sa potpuno neprimjerenim sadržajem poruke, što i po shvatanju apelacionog vijeća predstavlja govor kojim nije dozvojeno animirati birače sa ciljem davanja podrške na izborima.

Naime, odredba člana 7.3 stav 1. tačka 7. Izbornog zakona BiH propisuje samo jezik koji bi nekoga mogao navesti ili podstaći na nasilje ili širenje mrženje. Ne postoji zakonom utvrđena obaveza da se dokazuje

2

postojanje posljedica, nego da ocijeni, prema načelu materijalne istine, načelu zakonitosti i načelu ocjene dokaza, da li je korištenje određenog jezika moglo navesti ili podstaći na nasilje ili širenje mržnje.

Odredbom člana 1.1 Izbornog zakona BiH, izborna kampanja podrazumjeva period u kojem politički subjekt na zakonom utvrđen način upoznaje birače i javnost sa svojim programom i kandidatima za izbore. Ponašanje kandidata i pristalica političkih stranaka, listi nezavisnih kandidata i koalicija, kao i nezavisnim kandidatima je propisano odredbom člana 7.3 stav 1. tačka 7. Izbornog zakona. Pojedinci i političke stranke koje sudjeluju u izbornom postupku moraju poštivati pravila ponašanja.

Analizirajući plakat u cjelini CIK BiH je pravilno cijenila da je istaknuti plakat sa neprimjerenim sadržajem u predizbornom periodu, mogao navesti ili podstaći na nasilje ili širenje mržnje, odnosno da se predmetnim govorom na nedozvoljen način animira birače sa ciljem davanja podrške na izborima.

Žalbeni navodi kojima se osporava autentičnost fotografije se nije mogla prihvatiti kao opravdana. Naime, pretraživanjem na internetu, plakat sa navedenim sadržajem objavljen i na drugim portalima, na koji način je utvrđena u potpunosti autentičnost plakata koji je istaknut na predizbornom skupu žalitelja održanom dana 04.10.2018. godine u Tuzli.

Zbog navedenog, ne mogu se prihvatiti navodi žalbe kojima se ukazuje da nije na pouzdan način utvrđeno da se radi o autentičnim fotografijama sa predizbornog skupa žalitelja u Tuzli, imajući pri tome u vidu jasno definisana pravila ponašanja propisana Izbornim zakonom BiH.

Iz svega iznesenog može se sa sigurnošću utvrditi da je ožalbena odluka zasnovana na materijalnim propisima i da je u zakonito provedenom postupku dokazana odgovornost žalitelja.

Kada je u pitanju odmjeravanje novčane kazne, apelaciono vijeće nalazi da Centralna izborna komisija BiH nije pravilno cijenila težinu učinjenih povreda člana 7.3 stav 1. tačka 7. Izbornog zakona BiH i stepen odgovornosti žalitelja. Naime, članom 19.9 stav (1) tačka j) istog zakona je propisano da će se za ovu povredu politički subjekt kazniti novčanom kaznom u iznosu od 1.000,00 KM do 10.000,00 KM. U konkretnom slučaju utvrđena kazna od 7.000,00 KM je određena u granicama propisanim zakonom, ali ista, prema ocjeni ovog vijeća, nije srazmjerna učinjenom

prekršaju. Uzimajući u obzir navedeno, ovo vijeće je preinačilo izrečenu kaznu na iznos od 5.000,00 KM, koje će srazmjerno snositi članice koalicije, smatrajući da će se istom postići svrha kažnjavanja.

Iz svih navedenih razloga, apelaciono vijeće nalazi da je žalba djelimično osnovana, pa je istu primjenom odredbe člana 81. stav 1. u vezi sa odredbom člana 54. stav 2. Zakona o upravnim sporovima BiH (Službeni glasnik BiH broj 19/02-74/10), valjalo uvažiti i preinačiti ožalbeno rješenje Centralne izborne komisije BiH.

***PREDSJEDNIK VIJEĆA
SUDIJA
Sreto Crnjak***